

## DEDICATA AGLI ANZIANI DI RIVA SAN VITALE

Cari anzian da Riva San Vital  
prest ghè già scià anca Natal  
sem sempru prunt a festegià  
anca se i an in tanti da cüntà.

Se la salüt l'è bona  
e ogni organ al funziona  
un viagett o una passeggiada  
fan ben al corp e stüzican na bèla mangiada.

Ghè pürtropp quii che la furtüna ga l'an mìa  
e nà fö da ca sa la sentan no  
parché gan pagüra che ga gira ul cò.

Guardii quel vegett cul bastunel  
che al vör nà a truvà ul so fredel,  
ma la gamba cifulina la ga dör già ala matina  
però al sa già cumé fa, na quei banchéta  
giò al lag la truvarà.

Oltre a ripusà  
un quei soci al incuntrarà  
par pö pudé ciciarà.

Ècu, che ga nè scià un altru tütt stort e zupighent,  
dala faccia sa disaress che gà fa maa i dent.

Ul terz, do stampèl la tegnan in pée  
parché la scala da cà  
la vurüu misürà.

Süla strada lì visin,  
passa una pivèla che la va a Brüsin.  
Driza cumè un pal, la pedala con vigur  
beata lee che la ga mìa da dular.

Parleman mìa da quii che sa credan giuvinott,  
curan da sciaà e da là, anca da nott.

Quii pusée muderaa, che stan ben,

cun i so dunett ai van mìa cul tren.  
La machina la guidan prüdentement  
par mìa fa saltà la patent.

Ghé quii invece ammò lavuranti  
che ga pias sempru strüsà.  
L'ort e ul giardin  
ia tegnan cumè un pentin.

I noni dal paes  
ai guardan mìa a spees.  
Cun un ciclatin incöö e duman un giügatulin,  
ai fan cuntent i neudin.

Na volta l'era mìa inscì  
tütt l'è cambiaa e nüm sa sem adataa,  
alura i tusun giügavan ai cicc e a nascundin  
i tusan sa davan al cüsì, al ricamà  
ma mìa a giügatà.

La danza l'era un gran piasé,  
sa balava ul valzer cul casqué.  
Ul tango e ul walzer lent eran par gl'innamuraa,  
parché ai pudevan balà taca.

Pö parleman mìa da quela müsica muderna  
che la fa dumà tum-tum,  
ul telefunin la rimpiazzaa la radiulina  
e la televisiun la po vess na gran disperaziun.

La vita l'è cumé ul vent  
che al bofa da scià e da là.  
Incöö sem cuntent  
e duman sutum a bruntulà .

Quand s'è pinit sa mangia e sa cress.

A 20 ann ghé dumà i amis da scultà.

Tra i 30 e i 40 la vöia da lavurà l'è tanta.

A 50 l'età l'è ammò bèla e sa cerca da gudela.

A 60 sa cumincia a tunicà  
e sa pensa già all'AVS che ghè scia.

Dai 70 ai 80 sa god ul caldin dal camin  
E sa fa di bei ripusin

A 90 an la campanèla la sona da spess.

Dai 90 in sü, sa cumincia a pregà ul bun Gesù.

Cari vegitt dal paes,  
ala fin ben o maa sem ammò chi,  
cuntinuem sempru inscì  
finché ul Signur al ma lasa chi.

Fem un bel brindisi in allegrìa che tütt i mangagn al  
porta via.

SALUTE E AUGÜRI A TÜTT.

***Poesia scritta da una signora anziana di Riva San Vitale che desidera mantenere  
l'anonimato e dedicata a tutti gli anziani del Paese***